

## lis Gnovis

## ■ RONCJIS DI MONFALCON.

Mario Candotto a Rimini cun «Aned»



Intant dal XVIII congrès de clape dai deputâts tai «Lager» di Hitler, «Aned», celebrât a Rimini dai 4 ai 6 di Novembar, al è intervignût cun Liliana Segre ancje Mario Candotto, partesan di Roncjis di Monfalcon, tornât di Dachau daspò di jessi stât ridusût il «toc» numar 69 mil 610 e di vè sopuartât suplizis di ogni fate, cuant ch'al veve a pene 18 agns (tierç a man çampe, fra so nevôt e il president Dario Venegoni, te foto). Intant de convigne di Rimini, si son confrontâts 160 delegâts des 25 sezions locâls di «Aned», comprendis chês di Pordenon, di Roncjis di Monfalcon e di Udin. «Aned», ispirât dal sproc «Generazioni e Memoria», al intint di rinovâ il so impegn par dâur la volte ai ex deputâts tal puartâ indevant il dovê civil e politic de memorie e de cussience democratiche.

## ■ SAURIS/ZAHRE. Ocupazion militâr

Dai 2 ai 18 di Novembar, par altris 10 dîs, lis monts parsore Sauris Disore/Plotze a son stadis sieradis e fiscadis par colpe di un'esercitazion militâr cun armis portativis individuâls, bombis a man e mortârs. Il comandant militâr «Friuli-V. G.», cul befel numar 83/22, al stabilit di sgomberâ une zone grandone, ch'è a cjapât dentri teritoris dai Cumons di For Disore e di For Disot, di Prât, di Sauris e di Dimpeç e une part di Cjadovri, dulintor des monts Campo, Pederota e Razzo. Ducj chei ch'a àn paidît dams par colpe dai bombardaments a podaran presentâ une domande di rifusion, mediant dai siei Cumons, dentri dai 3 di Dicembar.

## ■ FODOM. La volontât ladine e va rispjetade

Lis vilis ladinis di Col/Colle Santa Lucia/Verseil, di Anpezo/Cortina/Haiden e di Fodóm/Livinalongo del Col di Lana/Buchenstein a àn prontât un apel pal gnûf guvier talian par che nol dismentei il referendum populâr dai 28 e dai 29 di Otubar dal 2007. In chês volte, i eletôrs dai trê Cumons de Provincie di Belun a vevin domandât, cuntune maiorance dal 78,86%, di jessi distacâts de Regjon Venet e di passâ te Regjon Trentin-Südtirol. I Ladins belumats al esecutif saltât fûr des votazions dai 25 di Setembar i domandin ch'al sedi presentât in curt un dissen di leç dal guvier «par che la cusion e je ancjemò dal dut atuâl e pal fat che ducj i costituzionaliscj a ritegnin che il referendum al restarà volevul fin cuant che un'altre consultazion populâr no smentissarà la decision populâr dal 2007». Za fa 15 agns, la votazion e jere stade inmaneade in grazie dal impegn des Unions ladinis di Fodom, di Col e di Anpezo. Midiant di chel istès imprest costituzionâl, la Comunitât di Plodn/Sapade dal 2017 e à otignût la riunificazion amministrative cul Friûl, votade vie pal 2008.



Miercus 16 S. Margarite di Scozie r.

Joibe 17 S. Lisabete di Ongjarie

Vinars 18 Dedicazion de Basiliche v.

Sabide 19 S. Matilde

Domenie 20

Lunis 21 La Madone de Salût

Martars 22 S. Cecilie vergjine

Il timp Timp variabil

Crist Re



**Il soreli**  
Ai 16 al jeve aes 7.09  
e al va a mont aes 16.34.



**La lune**  
Ai 16 Ultin cuart.

**Il proverbi**  
Cui ch'al po fâ vuê che nol spieta doman.  
**Lis voris dal mès**  
Zirait i terens pesants. Par chei plui lizêrs  
al baste rompi un pôc la tiere cu la forçje  
sgjavadore.

## Tirà sù la fiducia

Il «Festival de Dctrine sociâl de Glesie» al torne a Verone

«P» ar no restâ sopressâts o disconfortâts de realtât dal di di vuê, cui siei limits e cu lis sôs contradizions, ma par rivâ adore di traversâle, gjerant vite gnove e pussibilitâts gnovis, al vûl savût cjâlâ plui in là di noaltris; al è necessari tornâ a vè une prospetive che nus passe e o vin di tornâ a fondâ la nestre azion sun chel element costitutif dal om ch'è je la sperance...». Ogni slambri de presentazion da la XII edizion dal «Festival de Dctrine sociâl de Glesie» al sclârâ lis resons ch'a àn motivât la sielte dal argument di chest an: «Tirà sù la fiducia. La passion dal incuintri».

La convigne inmaneade de Fondazione «Segni Nuovi» e sarâ programade a Verone dai 24 ai 28 di Novembar, cuntun program di apontaments ch'al pues jessi scrutinat a la direzion: [https://dottrinasociale.it/images/festival/press/2022/Programma\\_Festival\\_DSC\\_2022\\_v\\_18\\_exit\\_11112022.pdf](https://dottrinasociale.it/images/festival/press/2022/Programma_Festival_DSC_2022_v_18_exit_11112022.pdf).

I protagoniscj de prime serade e de presentazion des voris a saran il diretôr di «Avvenire», Marco Tarquinio, e il segretari gjenerâl de Conference dai Vescui talians, monsignôr Giuseppe Andrea Salvatore Baturi. Po, il confront al sarâ animât di professôrs di Dctrine sociâl, di teolics e di academics, di puarte vòs di clapis catolicis, di economiscj e di imprenditôrs, di gjornaliscj, di diplomatics e di sorestants.

I problemis di plui grande atualitât in cont di economie, di finance e di Ben comun; di ambient e di energie; di salût, di educazion, di famee e di natalitât; di justizie e di diplomazie a saran confrontâts cul insegnament de Glesie su lis cusionis de vite sociâl. A saran proponudis convignis su «L'avi-



A Verone, si confrontarà l'insegnament de Glesie su la vite sociâl cu lis cusionis di plui grande atualitât

Dai 24 ai 28 di Novembar, une schirie di apontaments cun teolics, imprenditôrs, diplomatics e sorestants

gnî de democrazie: democrazie, autocrazie, ordin internazionâl gnûf e su «Sussidiarietât gjenerazionâl» e «Plan talian di recupar e di resilience» (ai 25 di Novembar); su «La curie des relazions come centri da l'educazion» e su «La passion dal incuintri: storiis veris di fameis postmodernis» (ai 26); e po su «Veretât e dialic» (ai 27). La sperance che il Festival de Dctrine sociâl al intint di fâ madurî e di slargjâ no je «un sintiment consolatori pai moments di dificolât, ma ce che

nus sburte a cambiâ lis robis, parcè che nus jude a crodi tal Ben comun, dulà ch'al è garantît il ben par ognidun, a tignî cont simpri e dapardut la vite, a crodi intal om e tes sôs grandis potenzialitâts di bon, ch'al vûl di tirâ sù la fiducia». Il Festival al finissarà domenie ai 27 di Novembar, cuntune liturgjie eucaristiche cjantade li dal domo di Verone dal gardenâl Mario Grech, segretari gjenerâl de Sinode dai Vescui.

Mario Zili

## Pordenon. Par valorizâ lis aghis de Patrie

Si varâ timp fintremai ai 10 di Zenâr di an cu ven par cjapâ part al concurs «Acque e territorio», inmaneât dal Circul «Legambiente» di Pordenon par memoreâ l'insegnante e ambientaliste di San Vît dal Tiliment, Franca Carniel. I students (di bessôi o cuntun grop) a podaran concori realizant un test, un video, une cjante, un spettacul teatrâl, un dissen o une fotografie svilupant la propueste: «Scegli un luogo attraversato dall'acqua, non lontano da casa tua o di una compagna o compagno, e raccontane le caratteristiche: la valenza naturalistica, turistica, la memoria, la storia, l'economia...». I grancj a varan di proponi une o dôs fotografis dedicadis a lis aghis de Patrie o di Triest. La direzion dal premi e je: [pordenone@legambientefvg.it](mailto:pordenone@legambientefvg.it).

## Messe par furlan

A Udin, la Messe par furlan e ven cjantade sabide ai 19 di Novembar a 5 e mieze soresere, li de capele «de Puritât», daprûf dal domo (cun Radio Spazio che le trasmet sul moment). E compagnarà la celebrazion la corâl «San Canzian» di Craui. Al cjantarà messe pre C. Marchica.



## Tradizions furlanis dal mès par cure di Mario Martinis

## LA FIESTE DAL RINGRACIAMENT

La fieste dal Ringraziament e je une festività religiose e agrarie di fin cicli inmaneade in diviers pais dal Friûl par rindi graciis a Diu dai prodots vûts de tiere. Si ten tor mieç nNovembar, forsit ancje tant che sacralizazion e omologazion sacre de antiche fieste populâr («profane») di Sant Martin, simpri scjampade al atent control de Glesie. Di fat, si sa che ancje la fieste di Sant Martin e à supât i antics festegjaments dai Celts e des popolazions agriculis de Europe che si fasevin ancjemò prin che al rivâs il cristianesim. Sigheduncje, ae Glesie i è lade une vore ben di titulâ a Martin, muart propit l'11 di novembar, la fiestone agrarie e rurâl che si tignive fintremai l'11 di chel mès ae conclusion dal antic Samhain. Ma tal mont agricul la fieste di Sant Martin e conservâ simpri



un caratar laic, populâr e licenziôs e cussì la Glesie e scugnî dedicâ une altre fieste di caratar esclusivamentri religjôs par rindi grazie a Diu dai prodots de tiere. E je nassude cussì la fieste dal Ringraziament, dulà che inte celebrazion de messe grande e ven fate une cerimonie di presentazion e di ufiarte al altâr dai plui bieci prodots de anade. Dopo la messe, in tantis localitâts il predi al benedis machinis agriculis e tratôrs metûts devant de glesie in bieles mostre. Dopo si ten il grant gustâ de comunitât dal pais, che par inmaneâlu dispès i zovins a fasevin une cuestule, opûr midiant i prodots des coltivazions ufierts dai stes agricultôrs. A la messe, e al gustâ, ancje in di di vuê, a cjapin part dutis lis fameis dal pais, il predi e lis autoritâts dal lûc, cul Sindic e il consei comunâl.